



Sarajevo, 07.03.2024.

**SARADNJA UNIVERZITETA U SARAJEVU - EKONOMSKOG FAKULTETA I DATALAB BH
OMOGUĆILA STUDENTIMA PRAKTIČNE VJEŽBE NA ERP SOFTVERU PANTHEON**

Dana, 06. 03. 2024.godine u računarskoj sali Univerziteta u Sarajevu – Ekonomskog fakulteta za studente III godine studija odsjeka Menadžment, smjer Računovodstvo i revizija, održano je predavanje na temu „Digitalizacija u računovodstvu – PANTHEON na EFSA“. Predavanje je rezultat uspješne saradnje Ekonomskog fakulteta i Datalab BH društva.

Dekanesa Fakulteta, prof. dr Meliha Bašić istakla je da nastavni program I ciklusa studija Ekonomije, Menadžmenta i Poslovnog upravljanja tokom VI semestra predviđa izradu i odbranu projekta u formi praktičnog i istraživačkog rada studenata, a specifičnost projekta koji realiziraju studenti smjera Računovodstvo i revizija ogleda se u računovodstvenom praćenju poslovnih transakcija i finansijskom izvještavanju kroz poslovno-informacioni sistem PANTHEON, zahvaljujući upravo izuzetno uspješnoj saradnji EFSA i Datalab BH, koja datira duže od desetljeća na polju edukacije studenata u skladu sa potrebama tržišta rada.

Saradnja Univerziteta u Sarajevu - Ekonomskog fakulteta i Datalab BH nije samo prirodna, već veoma obećavajuća. Upravo stručnost i posvećenost čine Datalab idealnim partnerom u ostvarivanju ciljeva saradnje: od uspostavljanja uspješnog poslovnog inkubatora do kreiranja novih PANTHEON konsultanata, koji su ključni u digitalnoj transformaciji kompanija. Studenti Ekonomskog fakulteta već obavljaju praktične vježbe na ERP softveru PANTHEON. Trenutna verzija instalirana na računarima je 10.36.10, a za svaki novi semestar radit će se nadogradnja na najnoviju verziju.

"Ponosni smo na našu dugogodišnju predanost u pružanju vrhunskih poslovnih rješenja i podrške našim klijentima. Partnerstvo s Ekonomskim fakultetom Univerziteta u Sarajevu predstavlja za nas ne samo priliku za naš daljnji doprinos, već mogućnost da zajedno oblikujemo budućnost poslovnog svijeta. Kroz našu saradnju, želimo podržati razvoj novih generacija lidera i stručnjaka, stvarajući okruženje koje potiče inovacije, digitalnu pismenost i konkurentnost na tržištu rada. Vjerujemo da će naša zajednička inicijativa ne samo unaprijediti poslovanje, već i oblikovati pozitivne promjene u širem društvenom kontekstu." - izjavio je Nedim Pašić, direktor Datalab BH.

Budući ekonomisti sa stručnim znanjem u oblasti e-računovodstva i digitalne transformacije preduzeća imaju izuzetnu perspektivu kako na lokalnom, tako i na regionalnom tržištu specijalističkih usluga. Njihova ekspertiza omogućava im da pruže ključne savjete i implementiraju napredna digitalna rješenja za kompanije širom regiona. Kao konsultanti u ovim oblastima, oni mogu voditi preduzeća kroz procese digitalne transformacije, optimizirati poslovne procese i osigurati konkurentsku prednost u sve digitalnijem poslovnom okruženju. Ova kombinacija znanja iz e-računovodstva i digitalne transformacije čini ih neophodnim akterima na regionalnom tržištu, gdje mogu ostvariti značajan uticaj na razvoj i inovacije u poslovanju.

Ured za odnose s javnošću